

Ad urbem recipiendam confestim classis decernitur, cui Belletus Justinianus est præfectus. Dux interim anno sui regiminis duodecimo ac mense nono, diem obivit: ejus funus ad Cypriani ædem est elatum. 1311

Marinus Georgius, cui a probitate vitæ Sancto cognomen fuisse traditur, Gradonico successit; toto fere hujus Principatu, qui annum non explevit, Veneti ob Ferrariensem causam Pontificis interdicto obnoxii fuere; hinc fuit, credo, quod domi forisque Respublica parum feliciter sit administrata. Nam in quam apertum discrimen Tepulana conjuratio civitatem adduxerit, proximo loco ostendimus. Sed nec apud Jaderam quidem paulo post est feliciter bellatum. Trajecerat in Dalmatiam Belletus Venetas copias, & in iis mille equites, quibus Dalmasium Patres præesse voluerunt, hominem strenuum, ac Hispani generis, cujus ductu circa Ferrariam, quum Pontificis stipendia faceret, Veneti ex urbe cum multa cæde fuerant in arcem compulsi. Quum itaque classis ad insulam quæ urbi proxima est, stationem haberet, Dalmasius cum toto equitatu in continentem egressus, loco Jaderæ propinquo metatur castra, vallo ac fossa munit. Erat Jaderæ præsidio barbarus quidam, cui Banno erat nomen: is, copiis urbe educis, & ipse ab Dalmasii castris mille passus confedit. Tota fere ætas sine ullo memorabili prælio hic consumpta est. Et jam autumnus appetebat, nec spes interim ulla potiundæ urbis aderat. Bannus pacem levioribus tentat conditionibus: quam quum non impetrasset, ad dolum versus cum Dalmasio clam egit, ut a Venetis in urbem transfret, factaque transitione, duo millia aureorum nummum in præsentia acciperet, præessetque tam diu urbi cum amplissimo stipendio, quam ipse præesse vellet: tantum ad hæc tritici & omnium quæ ad victum requiruntur, oppidani darent, quantum ad domesticum usum satis esse crederetur: promissa insuper navigia, quibus impedimenta suosque in Italiam aut alio, quotiens inde abire vellet, tuto trajiceret. His in hunc modum comparatis, simulat Dalmasius, quasi longioris moræ impa-

*Marinus
Georgius
Dux crea-
tur.*

1312